

**Ambil langkah pencegahan, bahaya jangkitan COVID-19 masih wujud - Dr Noor Hisham**  
**Astro Awani**  
**21 Jun 2020**  
**Umavathi Ramayah,**

PUTRAJAYA: Kementerian Kesihatan Malaysia (KKM) sekali lagi mengingatkan rakyat Malaysia bahawa bahaya jangkitan COVID-19 masih wujud dalam komuniti.

Ekoran itu, Ketua Pengarah Kesihatan, Datuk Dr Noor Hisham Abdullah menasihati orang ramai supaya sentiasa mengambil langkah-langkah pencegahan ketika melakukan aktiviti kunjung-mengunjung terutamanya apabila melibatkan warga emas dan kanak-kanak.

"KKM akan terus memantau situasi jangkitan di dalam dan luar negara menerusi maklumat daripada Pertubuhan Kesihatan Sedunia (WHO) dan akan sentiasa memaklumkan sebarang perkembangan," katanya dalam kenyataan di sini, pada Ahad.

Dalam perkembangan berasingan, Noor Hisham berkata, statistik yang dikeluarkan oleh Suruhanjaya Komunikasi dan Multimedia (SKMM) mendapati tiada pertambahan kertas siasatan baharu berhubung berita palsu dalam tempoh lebih tiga minggu yang lalu.

"Ini menunjukkan kesedaran masyarakat mengenai kepentingan tidak berkongsi berita palsu meningkat," ujarnya.

Beliau juga mengingatkan orang ramai supaya berhati-hati sebelum menyebarkan sebarang kandungan yang diragui kesahihannya.

Katanya, kandungan yang diragui kesahihan boleh disemak di laman web [www.sebenarnya.my](http://www.sebenarnya.my).

Setakat 20 Jun lalu katanya, portal tersebut merekodkan 137.6 juta pengunjung.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/ambil-langkah-pencegahan-bahaya-jangkitan-covid-19-masih-wujud-dr-noor-hisham-248152>